

Utusan Borneo : 03 September 2021

Dua pencuri juvana dibebaskan dengan bon dan jaminan ibu

MIRI: Dua remaja masing-masing diperintahkan Mahkamah Juvana dibebaskan dengan bon berkelakuan baik dua tahun dan jaminan RM800 dengan ibu sebagai penjamin setelah mengaku bersalah mencuri enjin motosikal milik seorang pekerja pasar raya.

Perintah itu dikeluarkan Majistret Leona Dominic Mojiliu setelah meneliti beberapa aspek termasuk pengakuan salah dan rayuan kedua-dua juvana terbabit, keterangan fakta kes,

berat kesalahan yang dilakukan mereka, kepentingan awam dan laporan akhlak mereka yang dibentangkan oleh pegawai penasihat dari Jabatan Kebajikan Masyarakat.

Dua juvana terbabit yang berusia 16 tahun masing-masing dari Desa Senadin dan Bandar Baru Permyjaya di sini telah didakwa mengikut Seksyen 379A Kanun Keseksan dan dibaca bersama Seksyen 34 kanun yang sama.

Jika sabit kesalahan, boleh dikenakan hukuman penjara

sekurang-kurangnya setahun dan tidak melebihi tujuh tahun serta denda.

Menurut keterangan kes, kedua-dua juvana terbabit didapati telah mencuri sebuah enjin motosikal kepunyaan Eric Paulster Willie Jilan, 19.

Mereka didakwa melakukan kesalahan itu dengan niat bersama pada jam 2 pagi, 21 April lalu di sebuah lot di Bandar Baru Permyjaya di sini.

Pendakwaan dilakukan ASP Mary Ong.